



Проект

ЎЗБЕКИСТОН РЕСПУБЛИКАСИ ВАЗИРЛАР МАҲКАМАСИ ҚАРОРИ
Солиқ тўловчиларни ҳисобга қўйиш тизимини янада такомиллаштириш чора-тадбирлари
тўғрисида
VQL-1058/24-2

Ўзбекистон Республикаси Президентининг “Миллий конунчилик базасини комплекс тизимлаштириш чора-тадбирлари тўғрисида” 2021 йил 30 апрелдаги ПФ-6218-сон Фармонига мувофиқ норматив-ҳуқуқий ҳужжатларни тизимлаштириш, шунингдек, солиқ тўловчиларни солиқ органларида ҳисобга қўйиш тизимини янада соддалаштириш мақсадида Вазирлар Маҳкамаси қарор қилади:

1. Вазирлар Маҳкамасининг “Солиқ тўловчиларни ҳисобга қўйиш соҳасидаги айрим давлат хизматларини кўрсатиш бўйича маъмурий регламентларни тасдиқлаш тўғрисида” 2022 йил 2 апрелдаги 150-сон қарорига 1-иловага мувофиқ қуйидагиларни назарда тутувчи ўзгартириш ва кўшимчалар киритилсин:

Ўзбекистон Республикасида солиқ тўловчининг идентификация рақамини бериш ва уни қўллаш тартибини белгилаш;

Ўзбекистон Республикасида солиқ тўловчининг идентификация рақамини бериш ва уни қўллаш тартиби тўғрисидаги маъмурий регламентни тасдиқлаш.

2. Ўзбекистон Республикаси Ҳукуматининг 2-иловага мувофиқ айрим қарорлари ўз кучини йўқотган деб ҳисоблансин.

3. Вазирлар Маҳкамаси ҳузуридаги Солиқ қўмитаси манфаатдор вазирликлар ва идоралар билан биргаликда икки ой муддатда ўзлари қабул қилган норматив-ҳуқуқий ҳужжатларни ушбу қарорга мувофиқлаштирилишини таъминласин.

4. Ушбу қарорнинг бажарилишини назорат қилиш Ўзбекистон Республикаси Бош вазирининг ўринбосари – иқтисодиёт ва молия вазири Ж.А.Қўчқоров ҳамда Вазирлар Маҳкамаси ҳузуридаги Солиқ қўмитаси раиси Ш.Д.Кудбиев зиммасига юклансин.

Ўзбекистон Республикасининг
Бош вазири

А. Арипов

Вазирлар Маҳкамасининг
2024 йил _____ “_____” даги
_____ -сон қарорига
1-илова

**Вазирлар Маҳкамасининг “Солиқ тўловчиларни ҳисобга қўйиш соҳасидаги айрим давлат
хизматларини кўрсатиш бўйича маъмурий регламентларни тасдиқлаш тўғрисида” 2022 йил
2 апрелдаги 150-сон қарорига киритилаётган ўзгартириш ва қўшимчалар**

1. 2-бандда:

тўққизинчи хатбошидаги “мувофиқ тасдиқлансин.” сўзлари “мувофиқ;” сўзи билан
алмаштирилсин;

қуйидаги мазмундаги ўнинчи хатбоши билан тўлдирилсин:

“Ўзбекистон Республикасида солиқ тўловчининг идентификация рақамини бериш ва уни
қўллаш тартиби тўғрисидаги маъмурий регламенти 9-иловага мувофиқ тасдиқлансин”.

2. Қуйидаги мазмундаги 9-илова билан тўлдирилсин:

“Вазирлар Маҳкамасининг
2022 йил 2 апрелдаги
150-сон қарорига
9-илова

**Ўзбекистон Республикасида солиқ тўловчининг идентификация рақамини бериш ва уни
қўллаш тартиби тўғрисидаги
МАЪМУРИЙ РЕГЛАМЕНТИ**

1-боб. Умумий қоидалар

1. Мазкур Регламент Ўзбекистон Республикасининг Солиқ кодексига (кейинги ўринларда
– Солиқ кодекси) мувофиқ Ўзбекистон Республикасида солиқ тўловчининг идентификация
рақамини (кейинги ўринларда – идентификация рақами) бериш ва уни қўллаш тартибини
белгилайди.

2. Солиқ тўловчиларга идентификация рақамларини бериш қуйидагиларни таъминлашга
қаратилган:

Ўзбекистон Республикаси солиқ тўловчиларининг ягона реестрини шакллантириш;

солиқ тўловчиларни ҳисобга олишни тартибга солиш;

ҳисобланган ҳамда тўланган солиқлар ва йиғимлар суммалари, шунингдек пенялар ва
жарималарнинг ҳисобини юритиш;

солиқ органлари билан давлат ҳокимияти ва бошқарувининг бошқа органлари, банк
муассасалари ва молиявий тусдаги, шунингдек, кўчар ва кўчмас мулк бўйича операцияларни
амалга оширувчи бошқа ташкилотлар ўртасида ахборот алмашишда ягона идентификатордан
фойдаланиш;

қонунчиликда белгиланган ўз вазифалари ва функцияларини бажаришда давлат ва
хўжалик бошқаруви органлари, маҳаллий давлат ҳокимияти органлари ва бошқа ташкилотлар

Ўртасида юридик шахсларга нисбатан ахборотлар алмашишни унификация қилиш.

3. Ҳисобга олишда ҳар бир солиқ тўловчига (бундан жисмоний шахслар мустасно) Ўзбекистон Республикасининг бутун ҳудудида ягона бўлган идентификация рақами берилади ва у ўзгартирилмайди.

4. Идентификация рақами бир марта берилади ва юридик шахс тугатилгандан (ҳисобдан чиқарилгандан) кейин фойдаланиш чекланади.

Тугатилган (ҳисобдан чиқарилган) юридик шахснинг идентификация рақами бошқа солиқ тўловчига такроран берилмайди.

5. Идентификация рақами берилганлиги учун тўлов ундирилмайди.

6. Жисмоний шахсларни солиқ органларида солиқ тўловчи сифатида ҳисобга қўйиш жисмоний шахснинг шахсий идентификация рақами орқали амалга оширилади.

Бунда, жисмоний шахсларга ваколатли орган томонидан берилган жисмоний шахснинг шахсий идентификация рақами солиқ тўловчининг идентификация рақами ҳисобланади.

2-боб. Идентификация рақамининг тузилиши

7. Идентификация рақами тўққизта рақамли белгидан иборатдир, дастлабки 8 рақам солиқ тўловчининг ўз рақами, охириги рақам эса назорат сонини ташкил этади.

Идентификация рақами тузилиши қуйидагича кўринишга эга бўлади:



Ушбу мақсадларда 20000000Хдан 39999999Хгача бўлган кодлардан фойдаланилиши керак.

Бунда Х-солиқ тўловчининг идентификация рақами сонлари изчиллиги тўғрилигини назорат қилувчи сон, ушбу сон Ўзбекистон Республикаси Вазирлар Маҳкамаси ҳузуридаги Солиқ қўмитасида (кейинги ўринларда – Солиқ қўмитаси) компьютер томонидан солиқ тўловчига идентификация рақами бериш жараёнида муайян алгоритм бўйича шакллантирилади.

Зарурат бўлганда, кодлаштириш тизими имкониятларини кенгайтириш мақсадида қуйидаги кодлар захира қилинган:

00000000Хдан 19999999Хгача;

70000000Хдан 99999999Хгача.

8. Кодлаштиришнинг мазкур тузилиши ўзгармас ва универсал ҳисобланади ҳамда Ўзбекистон Республикасида солиқ тўловчиларнинг идентификация рақамларини бериш ва уларни қўллаш тизимида фойдаланиши керак.

3-боб. Идентификация рақамини бериш

9. Идентификация рақами:

нодавлат нотижорат ташкилотларга адлия органларида давлат рўйхатидан ўтказиш жараёнида;

банклар, кредит бюрolari ва чет эл банкларининг ваколатхоналарига Ўзбекистон Республикаси Марказий банки томонидан давлат рўйхатидан ўтказиш (аккредитация қилиш) жараёнида;

дипломатик ваколатхоналар, хорижий давлатларнинг консуллик муассасалари ва халқаро ташкилотларнинг ваколатхоналарига Ўзбекистон Республикаси Ташқи ишлар вазирлигида аккредитациядан ўтказиш жараёнида;

хорижий тижорат ташкилотларининг ваколатхоналарига Ўзбекистон Республикаси Инвестициялар, саноат ва савдо вазирлигида аккредитациядан ўтказиш жараёнида;

бошқа юридик шахсларга Давлат хизматлари марказларида давлат рўйхатидан ўтказиш жараёнида;

чет эл юридик шахсларининг доимий муассасаларини ҳамда алоҳида бўлинмаларини, Ўзбекистон Республикасида товар-хом ашё биржаларида операцияларни амалга оширувчи ва (ёки) ташкиллаштирилган савдоларда жамиятларнинг акцияларини сотиб оладиган (сотадиган) ҳамда жисмоний шахсларга Ўзбекистон Республикаси ҳудуди реализация қилиш жойи деб эътироф этиладиган электрон шаклдаги хизматларни кўрсатувчи чет эл юридик шахсларига, шунингдек солиқ тўғрисидаги қонунчиликда назарда тутилган бошқа ҳолларда солиқ органларида ҳисобга қўйишда Солиқ қўмитаси томонидан берилади.

10. Идентификация рақами аниқ вақт режимида, янгидан ташкил этилаётган юридик шахсларга, шунингдек хорижий юридик шахсларни тадбиркорлик субъектлари сифатида давлат рўйхатидан ўтказишда ёки солиқ мажбуриятлари пайдо бўлганда ёхуд қонунчиликда белгиланган бошқа ҳолларда давлат рўйхатидан ўтказишда (ҳисобга олишда) берилади.

11. Идентификация рақами ушбу Регламентга иловага мувофиқ схема бўйича берилади.

12. Идентификация рақамини шакллантириш бўйича рўйхатдан ўтказувчи орган томонидан юборилган сўровлар Солиқ қўмитаси ахборот тизимларида махсус текширувдан ўтказилади.

Маълумотларни махсус текширувдан ўтказиш шартлари рўйхатдан ўтказувчи орган ва Солиқ қўмитаси ўртасида имзоланадиган маълумот алмашиш бўйича техник ҳужжатлар билан белгиланади.

Идентификация рақамини шакллантириш бўйича рўйхатдан ўтказувчи орган томонидан юборилган сўровга асосан маълумотларда хатолик аниқланса, реал вақт режимида хатолик сабаби кўрсатилган ҳолда жавоб ахборот тизимлари орқали рўйхатдан ўтказувчи органга юборилади.

4-боб. Яқунловчи қоидалар

13. Солиқ тўловчи Солиқ кодексининг 127-моддасида кўрсатилган ҳужжатларга ўзининг идентификация рақамини аниқ ва равшан қўйиши шарт.

Давлат ва хўжалик бошқаруви органлари, маҳаллий давлат ҳокимияти органлари ва бошқа ташкилотлар Солиқ кодексининг 127-моддасида кўрсатилган ҳужжатларда идентификация рақамини аниқ ва тушунарли қилиб қайд этишлари шарт.

14. Солиқ тўловчининг Солиқ кодексининг 127-моддасида кўрсатилган барча

хужжатларда идентификация рақамини нотўғри ёки ноаниқ кўрсатиши солиқ тўловчиларнинг идентификация рақамларини қўлланиш тартибини бузишга тенглаштирилади.

15. Ушбу Регламент талабларини бузишда айбдор бўлган шахслар қонунчилик хужжатларига мувофиқ жавоб берадилар.

Ўзбекистон Республикасида солиқ тўловчининг идентификация рақамини бериш ва уни қўллаш тартиби тўғрисидаги маъмурий регламентга илова

Ўзбекистон Республикасида солиқ тўловчининг идентификация рақамини бериш

СХЕМАСИ

Босқичлар	Субъектлар	Чора-тадбирлар	Муддатлар
1-босқич	Солиқ тўловчининг вакили	Рўйхатдан (аккредитациядан) ўтказувчи (ҳисобга олувчи) органга ариза беради.	Мурожаат қилинганда
2-босқич	Рўйхатдан (аккредитациядан) ўтказувчи орган Солиқ органи	1. Солиқ тўловчининг вакили томонидан тақдим этилган маълумотлар асосида солиқ тўловчини рўйхатдан (аккредитациядан) ўтказиб, маълумотларни ахборот тизимига киритади ва идентификация рақамини бериш бўйича сўров юборади. 2. Аризада келтирилган маълумотларни Ўзбекистон Республикаси солиқ тўловчиларининг ягона реестрига киритади.	Қонунчилик хужжатларида белгиланган муддатларда
3-босқич	Солиқ қўмитаси	1. Ахборот тизими орқали рўйхатдан (аккредитациядан) ўтказувчи органдан келган маълумотларни махсус текширувдан ўтказилади. 2. Маълумотлар тўлиқ ва тўғри бўлса, идентификация рақамини шакллантириб ахборот тизими орқали рўйхатдан (аккредитациядан) ўтказувчи органга юборади. 3. Чет эл юридик шахсларини ҳисобга олишда солиқ тўловчининг вакилига идентификация рақами берилганлиги бўйича гувоҳномани тақдим этади ёки электрон почта манзилига юборади. 4. Маълумотларда хатолик аниқланса, идентификация рақами шаклланмайди ва хатолик сабаби кўрсатилиб ахборот тизими орқали рўйхатдан (аккредитациядан) ўтказувчи органга қайтарилади.	Реал вақт режимида
4-босқич	Рўйхатдан (аккредитациядан) ўтказувчи орган	Солиқ қўмитаси томонидан қайтарилган хатолик бартараф қилинади ва идентификация рақамини бериш бўйича қайта сўров юборади.	Хатолик аниқланганда

”.

Вазирлар Маҳкамасининг
2024 йил _____ “_____” даги
_____ -сон қарорига
2-илова

**Ўзбекистон Республикаси Ҳукуматининг ўз кучини йўқотган
деб эътироф этилаётган айрим қарорлари**

РЎЙХАТИ

1. Вазирлар Маҳкамасининг “Ўзбекистон Республикасида солиқ тўловчиларнинг идентификация рақамларини бериш ва қўллаш тизими тўғрисида” 1997 йил 11 мартдаги 130-сон қарори (Ўзбекистон Республикаси ҚТ, 1997 й., 3-сон, 10-модда).
2. Вазирлар Маҳкамасининг “Солиқ тўловчиларнинг идентификация рақамларини қўллаш соҳасини кенгайтириш тўғрисида” 1999 йил 7 январдаги 7-сон қарори.
3. Вазирлар Маҳкамасининг “Ўзбекистон Республикаси Президентининг “Тадбиркорлик субъектларини давлат рўйхатидан ўтказиш ва ҳисобга қўйиш тизимини такомиллаштириш тўғрисида” 2016 йил 28 октябрдаги ПҚ-2646-сон қарорини амалга ошириш чора-тадбирлари тўғрисида” 2017 йил 9 февралдаги 66-сон қарорига 4-илованинг 2-банди.
4. Вазирлар Маҳкамасининг “Юридик шахснинг алоҳида бўлинмалари бўйича солиқларни тўлаш тартиби тўғрисидаги низомни тасдиқлаш ҳақида” 2017 йил 27 февралдаги 105-сон қарори.
5. Вазирлар Маҳкамасининг “Юридик шахснинг алоҳида бўлинмалари бўйича солиқларни тўлаш тартибини такомиллаштириш, шунингдек Жиззах вилояти маҳаллий бюджетининг даромад қисмини мустаҳкамлашга доир қўшимча чора-тадбирлар тўғрисида” 2017 йил 22 сентябрдаги 751-сон қарори.
6. Вазирлар Маҳкамасининг “Ўзбекистон Республикаси Ҳукуматининг айрим қарорларига ўзгартириш ва қўшимчалар киритиш, шунингдек, баъзиларини ўз кучини йўқотган деб ҳисоблаш тўғрисида (Ўзбекистон Республикаси Президентининг “Ўзбекистон Республикасининг 2018 йилги асосий макроиктисодий кўрсаткичлари прогнози ва Давлат бюджети параметрлари тўғрисида” 2017 йил 29 декабрдаги ПҚ-3454-сон қарори)” 2018 йил 22 майдаги 384-сон қарорига 1-илованинг 11-банди.
7. Вазирлар Маҳкамасининг “Давлат солиқ хизмати соҳасида давлат хизматлари кўрсатишнинг айрим маъмурий регламентларини тасдиқлаш тўғрисида” 2018 йил 13 октябрдаги 823-сон қарорининг 6-банди ва 3-иловаси.
8. Вазирлар Маҳкамасининг “Аҳоли ва тадбиркорлик субъектларининг давлат хизматларидан фойдаланиш имкониятлари кенгайтирилиши муносабати билан Ўзбекистон Республикаси Ҳукуматининг айрим қарорларига ўзгартириш ва қўшимчалар киритиш, шунингдек, баъзиларини ўз кучини йўқотган деб ҳисоблаш тўғрисида” 2021 йил 27 декабрдаги 774-сон қарорига 1-илованинг 1-банди.
9. Вазирлар Маҳкамасининг “Ўзбекистон Республикаси Ҳукуматининг айрим қарорларига ўзгартиришлар киритиш тўғрисида (Ўзбекистон Республикасининг “Норматив-ҳуқуқий ҳужжатлар тўғрисида” 2021 йил 20 апрелдаги ЎРҚ-682-сон қонуни)” 2022 йил 4 апрелдаги 153-сон қарорига илованинг 21 ва 394-бандлари.